

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na 62. sjednici Predstavničkog doma, održanoj 23. januara 2014. godine i na 37. sjednici Doma naroda, održanoj 29. aprila 2014. godine, usvojila je

ZAKON

O IZMJENAMA I DOPUNAMA ZAKONA O PREKRŠAJIMA

Član 1.

U Zakonu o prekršajima ("Službeni glasnik BiH", br. 41/07 i 18/12), u članu 3. stav (1) tačka g) mijenja se i glasi:"g) Uručenje poziva poštom je uručenje putem preporučene pošte na adresu fizičkog lica, koja se nalazi u Evidenciji prebivališta i boravišta građana Bosne i Hercegovine, koju u okviru svoje nadležnosti vodi Agencija za identifikacione dokumente, evidenciju i razmjenu podataka Bosne i Hercegovine ili na registriranu adresu domaćeg pravnog lica ili predstavništva stranog lica u Bosni i Hercegovini."

Član 2.

U članu 6. stavu (4) broj "24" zamjenjuje se brojem "72".

Član 3.

U članu 12. riječi: "pravno lice ima sjedište" zamjenjuju se riječima: "je sjedište domaćeg pravnog lica ili predstavništva stranog lica u Bosni i Hercegovini".

Član 4.

Iza člana 15. dodaju se novi čl. 15a., 15b., 15c. i 15d., koji glase:"Član 15a.(Prekršajna odgovornost pravnih lica i odgovornih lica u pravnim licima)(1) Ovim zakonom uređuje se prekršajna odgovornost pravnih lica i odgovornih lica u pravnim licima.(2) Prekršajna odgovornost pravnog lica prestaje prestankom njegovog postojanja, a u slučaju postojanja njegovog pravnog sljednika, za prekršaj odgovara njegov sveukupni pravni sljednik. Ako je sljednika više, sud će utvrditi koji od njih, s obzirom na prirodu sljedništva, odgovara za prekršaj.(3) Odredbe ovog zakona kao i drugih propisa koji se odnose na prekršajnu odgovornost pravnog lica i u njemu odgovornih lica primjenjuju se i na s njima izjednačene subjekte: predstavništva i poslovne jedinice domaćih i stranih lica, druge subjekte koji nemaju pravnu sposobnost, ali samostalno nastupaju u pravnom prometu, te na odgovorna lica u tim subjektima.

Član 15b.

(Osnova odgovornosti pravnog lica i odgovornog lica u pravnom licu)

(1) Pravno lice i odgovorno lice u pravnom licu prekršajno su odgovorni za povrede propisa o prekršaju.(2) Propisom o prekršaju može se za prekršaj propisati prekršajna odgovornost samo pravnog lica.(3) Sud će utvrditi prekršajno odgovornim pravno lice i u slučaju kada se utvrdi postojanje pravnih ili stvarnih prepreka za utvrđivanje odgovornosti odgovornog lica ili se ne može utvrditi ko je odgovorno lice.

Član 15c.

(Odgovorno lice)

(1) Odgovorno lice u smislu ovog zakona je fizičko lice koje vodi poslove pravnog lica ili mu je povjereno obavljanje određenih poslova iz oblasti djelovanja pravnog lica.(2) Propisom o prekršaju može se propisati koje odgovorno lice u pravnom licu odgovara za određeni prekršaj.(3) Odgovorno lice prekršajno odgovara za počinjeni prekršaj i u slučaju ako nakon počinjenja prekršaja prestane raditi u pravnom licu ili ako je nakon počinjenja prekršaja pravno lice prestalo postojati.

Član 15d.

(Isključenje i ograničenje odgovornosti pravnih lica)

(1) Bosna i Hercegovina, Federacija Bosne i Hercegovine, Republika Srpska, Brčko Distrikt Bosne i Hercegovine i kanton ne mogu prekršajno odgovarati.(2) Jedinice lokalne samouprave odgovaraju za prekršaje koji su počinjeni radnjama koje ne ulaze u izvršavanje njihovih javnih ovlaštenja.(3) Isključenje odgovornosti Bosne i Hercegovine, Federacije Bosne i Hercegovine, Republike Srpske, Brčko Distrikta Bosne i Hercegovine, kantona i jedinica lokalne samouprave prema st. (1) i (2) ovog člana ne isključuje mogućnost prekršajne odgovornosti odgovornog lica za taj prekršaj u organima iz st. (1) i (2) ovog člana."

Član 5.

U članu 19. stav (2) mijenja se i glasi:"(2) Fizičkom licu može se propisati novčana kazna u najmanjem iznosu od 30,00 KM, odgovornom licu u pravnom licu u najmanjem iznosu od 50,00 KM, a pravnom licu u najmanjem iznosu od 500,00 KM."

Član 6.

U članu 28. stav (1) tačka h) iza riječi "broj" dodaju se riječi: "za domaća pravna lica, a za strana lica naziv, sjedište i broj registra ili druge evidencije u državi sjedišta stranog lica, a ako strano lice ima predstavništvo u Bosni i Hercegovini, broj upisa u Registar predstavništava stranih lica u Bosni i Hercegovini".

Član 7.

Naziv člana 42. mijenja se i glasi: "Izvršenje prekršajnih sankcija i postupak prinudne naplate".Iza stava (2) dodaje se novi stav (3) koji glasi:"(3) Ako pravno lice prestane postojati nakon pravosnažnosti odluke o prekršaju, prekršajne sankcije izvršit će se u odnosu na pravnog sljednika. O izvršenju prekršajne sankcije protiv pravnog sljednika sud će donijeti posebno rješenje protiv kojeg je dozvoljena žalba. Uložena žalba odgađa izvršenje rješenja."U dosadašnjem stavu (3) koji postaje stav (4) riječi: "poreskoj upravi" zamjenjuju se riječima: "poreskim upravama".Dosadašnji stav (4) postaje stav (5).

Član 8.

Ovaj zakon stupa na snagu osmog dana od dana objavljivanja u "Službenom glasniku BiH".

Broj 01,02-02-1-54/13 29. aprila 2014. godine Sarajevo Predsjedavajući Predstavničkog doma Parlamentarne skupštine BiH Dr. **Milorad Živković**, s. r.

Predsjedavajući Doma naroda Parlamentarne skupštine BiH Dr. **Dragan Čović**, s. r.

Pretplatnici imaju dodatne pogodnosti. Ukoliko ste već pretplatnik, prijavi te se! Ukoliko niste pretplatnik, registrirajte se!

O nama

Javno preduzeće Novinsko-izdavačka organizacija SLUŽBENI LIST BOSNE I HERCEGOVINE. Sva prava pridržana. 2014

Adresa